



# ILIDŽA

INFORMATIVNI BILTEN OPĆINE ILIDŽA





## 21. REDOVNA SJEDNICA OPĆINSKOG VIJEĆA

### Utvrđen Nacrt Odluke o usvajanju i provođenju RP „Doglodi“

Općinsko vijeće Ilidža na sjednici održanoj 30. oktobra 2014. godine u Multifunktionalnoj sali utvrdilo je Nacrt odluke o usvajanju i provođenju Regulacionog plana „Doglodi“. Nacrt se upućuje na javnu raspravu u trajanju od 30 dana. Služba za prostorno uređenje je zadužena da u saradnji sa Zavodom za planiranje razvoja Kantona Sarajevo podnese izvještaj o rezultatima javne rasprave i pripremi prijedlog Odluke o usvajanju i provođenju Regulacionog plana „Doglodi“. Općinsko vijeće Ilidža zatražilo je da se nakon usvajanja Regulacionog plana „Doglodi“ krene u izgradnju saobraćajnice „Bregovi“ i da se u skladu sa zakonom riješi pitanje eksproprijacije objekata koji se nalaze u zaštitnom pojasu ove saobraćajnice.



### Informacija o praćenju stanja ugroženosti od poplava na svim rizičnim područjima općine Ilidža

Pred vijećnicima na sjednici se našla i Informacija o praćenju stanja ugroženosti od poplava na svim rizičnim područjima općine Ilidža. Prema informaciji Službe za razvoj, investicije i komunalne poslove u toku su aktivnosti preventivnih mjera zaštite od poplava, što uključuje nastavak regulacije rijeke Dobrinje u dužini od 100 metara i regulaciju korita rijeke Zujevine u dužini od 150 metara. Također, u toku je i procedura javne nabavke za čišćenje vodotoka po mjesnim zajednicama. Služba civilne zaštite će i dalje redovno pratiti stanje svih vodotoka i poduzimati mjere zaštite i spašavanja.

### Javni oglas za imenovanje dva člana OIK-a

Na 21. redovnoj sjednici Općinsko vijeće Ilidža donijelo je odluku o objavi Javnog oglasa za imenovanje dva člana Općinske izborne komisije Ilidža. Oglas će biti objavljen 3. novembra 2014. godine u dnevnom listu „Oslobođenje“. Članove OIK-a imenuje Općinsko vijeće uz saglasnost Centralne izborne komisije na period od sedam godina. Posebni uslovi za člana OIK-a su: da ima prebivalište u Općini Ilidža, da ima završen pravni fakultet, odnosno VII/1 stepen stručne spreme društvenog smjera ili završenu višu školu, odnosno VI/1 stručne spreme društvenog smjera, da posjeduje iskustvo u provođenju izbora, članstvo u izbornoj komisiji, članstvo u biračkom odboru, rad u stručnim organima koji su pružali pomoć u provedbi izbora, obavljanje stručnih i naučnih radova iz oblasti izbora. Član OIK-a može biti predsjednik ili sudija redovnog suda, sekretar općinskog vijeća, odnosno skupštine opštine i gradskog vijeća, lica profesionalno zaposlena u općinskim organima uprave i druga lica ako ispunjavaju uslove iz oglasa. Rok za podnošenje prijava je osam dana od objave.

## Saglasnost za provođenje postupka dodjele koncesije firmama TBG BH i Brajlović

Općinsko vijeće Ilidža je na 21. redovnoj sjednici u skladu sa Zakonom o koncesijama, donijelo odluku o davanju saglasnosti za provođenje postupka dodjele koncesije na istraživanje i eksploataciju podzemne vode na k.č. 1475/5 KO Donji Butmir (k.č. dio 1722 KO Doglodi) iz navedenog bunarskog postrojenja firme TBG BH d.o.o. Kakanj. Vijeće je donijelo i odluku o davanju saglasnosti za postupak dodjele koncesije za korištenje podzemnog bunara u Rakovici firmi Brajlović d.o.o. Ilidža.



## Donešena Odluka o prenosu prava upravljanja i korištenja vodnih objekata za vodosnabdjevanje Rakovice

Općinsko vijeće Ilidža je na osnovu Zakona o vodama FBiH, donijelo Odluku o prenosu prava upravljanja i korištenja vodnih objekata za vodosnabdjevanje u okviru javnog vodovodnog sistema Rakovica. Poslije niza godina rada na realizaciji projekta izgradnje vodovodnog sistema u Rakovici konstatovano je, da je okončana faza izgradnje niza važnih vodnih objekata, okončan postupak njihovog tehničkog prijema i pribavljeno odobrenje za korištenje. Predmetni vodni objekti su finansirani budžetskim sredstvima Kantona Sarajevo u iznosu

od 4.300.000,00KM i Općine Ilidža u iznosu od 1.010.000,00KM. Svi su dio javnog vodovodnog sistema i u posjedu su KJKP "Vodovod i kanalizacija" d.o.o Sarajevo. Bez obzira na činjenicu da su predmetni vodni objekti u posjedu navedenog KJKP, troškove potrošnje električne energije i dalje snosi Općina Ilidža. U cilju održavanja istih u funkcionalnom stanju i korištenja u skladu sa njihovom prirodom i namjenom i plaćanja električne energije, neophodno je predmetne vodne objekte formalno pravno predati na upravljanje i korištenje KJKP "Vodovod i kanalizacija" d.o.o Sarajevo.



## Suljo Alić istupio iz Stranke za BiH

Dopredsjedavajući Općinskog vijeća Ilidža Suljo Alić istupio je iz Stranke za BiH, na čijoj listi je izabran kao vijećnik te je informisao Vijeće da će se od 30. oktobra izjašnjavati kao samostalni vijećnik.

## Prijedlozi akata o regulisanju imovinsko- pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Kaltak Muje, Durović Majiza, Čolak Vesefa, Ibri Midhata i Čosović Medihe, te Čelik Farisa i Erme. Usvojeni su i prijedlozi rješenja o rješavanju imovinsko-pravnih odnosa u svrhu legalizacije stambeno-poslovnog objekta po zahtjevu Delalić Adema i prijedlog rješenja o rješavanju imovinsko-pravnih odnosa u svrhu legalizacije pomoćnog objekta po zahtjevu Čenanović Ramiza.



## Općina Ilidža donirala 15.000 KM Četvrtoj gimnaziji

Općina Ilidža dodijelit će 15.000,00 KM Četvrtoj gimnaziji za adaptaciju sanitarnih čvorova i sanaciju kanalizacione mreže. Tim povodom, u Općini Ilidža, 16. oktobra 2014. godine potpisan je sporazum između Ministarstva za obrazovanje, nauku i mlade Kantona Sarajevo, Četvrte gimnazije i Općine Ilidža. Sporazum su potpisali direktor škole Šefik Dželović, zastupnik ministra Ljiljana Prečec i načelnik Općine Ilidža prof. dr. Senaid Memić. Prisutni su izrazili zadovoljstvo i zahvalnost Općinskom načelniku prof. dr. Senaidu Memiću na izdvojenim sredstvima, iako finansiranje obrazovanja nije u direktnoj nadležnosti Općine Ilidža. Zastupnica ministra za obrazovanje, nauku i mlade Ljiljana Prečec naglasila je kako je donacija rezultat brige načelnika i Općine Ilidža i da

će se ta sredstva utrošiti za rješavanje gorućeg problema u ovoj školi. "Ovo nije prvi put da se Općina Ilidža odazvala na potrebe škole, sredstva su nam jako potrebna i na pravi način ćemo ih iskoristiti. Zahvaljujem se načelniku prof. dr. Senaidu Memiću zbog toga što je uvidio problem i na ovaj način doprinjeo njegovom rješavanju", kazao je direktor Četvrte gimnazije Šefik Dželović. „Iako nije naša nadležnost mi osjećamo potrebu da ovoj školi pomognemo. Ovdje idu naša djeca koja postižu izvanredne rezultate. Mislim da im mi, kao lokalna zajednica bar donekle moramo osigurati uslove za školovanje, a oni to znaju i znat će vratiti“, izjavio je, između ostalog, načelnik Općine Ilidža prof. dr. Senaid Memić.



## Dodjeljena četiri motokultivatora

„Socio-ekonomsko osnaživanje žrtava mina i njihovih porodica“, naziv je projekta koji realizira ASB-Njemačka humanitarna organizacija i Općina Ilidža. Tako je, 23. oktobra ispred zgrade Općine Ilidža, dodijeljeno četiri motokultivatora, a sve u sklopu realizacije ovog projekta. Učesnici su stradalnici od mina ili članovi njihovih porodica, tako da je 14 porodica sa područja općine Ilidža zadovoljilo kriterije. Od tih 14 porodica, dvije porodice su dobile muzne krave, četiri porodice su izrazile potrebu za motokultivatorom, dok ostalih osam porodica očekuju mašine za pakovanje šećera, košnice za pčele, aparate za hemijsku čistoniu. Motokultivatore

su dobili Amir Čohodar, Vahid Ibrahimović, Amir Čengić i Čamil Brajan. Pomoćnica načelnika za rad, socijalna pitanja, zdravlje, izbjeglice i raseljena lica, Sejda Topalović, kazala je da Općina Ilidža želi da pomogne građanima nastradalim od dejstva mina koji hoće da rade i privređuju. Cilj projekta je socijalno i ekonomsko osnaživanje ovih porodica i pomoć pri otvaranju biznisa, kako bi imali sigurnu egzistenciju. Ukupna vrijednost projekta je 86.700 KM, a Općina Ilidža učestvuje sa 15.000 KM. „Ovakve donacije pomažu stvaranju porodičnog biznisa kako bi se prehranile porodice i da ljudi sa određenim invaliditetom se osjećaju korisnim. Općina je i ranije izdvajala značajna sredstva ovim kategorijama u vidu donacija plastenika, košnica i slično“, kazala je pomoćnica načelnika Sejda Topalović. Nastradali od dejstva mina, koji su ovoga puta dobili motokultivatore nisu krili zadovoljstvo i zahvalnost Općini Ilidža i ASB organizaciji te su istakli da su u teškoj materijalnoj situaciji i da niko u porodicama ne radi. „Do sada sam ručno obrađivao zemlju i prehranjivao porodicu od male invalidnine, a ova mašina će mi olakšati mnogo. Hvala svim dobrim ljudima“, rekao nam je jedan od dobitnika motokultivatora Čamil Brajan. Rusmir Hanjalić, projekt menadžer ASB humanitarne organizacije kazao je da je Općina Ilidža jedna od 22 partnera u ovom projektu i da se nada da su donacije otišle u prave ruke.

# U Domu zdravlja Ilidža svečano otvoren Centar za mamografiju

U organizaciji JU Zavod za zdravstvenu zaštitu žena i materinstva Kantona Sarajevo, 07. oktobra 2014. godine u Domu zdravlja Ilidža održana je ceremonija puštanja u rad i otvaranja Centra za mamografiju. Centar za mamografiju Doma zdravlja Ilidža otvorili su direktor Zavoda za zdravstveno osiguranje Sarajevo dr. Kenan Crnkić, ministar zdravstva KS dr. Eldan Lokmić i načelnik Općine prof. dr. Senaid Memić. Direktor JU Zavoda za zdravstvenu zaštitu žena i materinstva KS Mithat Kurtović je kazao da je puštanje u rad ovog mamografa veoma važno zbog prevencije karcinoma dojke. "Sada žene sa ovih područja nemaju potrebe da idu ka gradu, na Otoku ili Centar, nego će sve ovdje završavati. Dobili smo i ultrazvučni aparat, to znači, dobili smo i treću sondu, tako da će žene sa problemima moći odmah uraditi ultrazvuk dojke", kazao je Kurtović. Načelnik Općine Ilidža na podršku te izrazio spremnost da u narednom periodu u punom kapacitetu općina participira u budućim projektima koji su od velike koristi za njene građane i Kantona Sarajevo u cjelini.



## Otvoren pothodnik na Stupskoj petlji

Pothodnik na Stupskoj petlji svečano je otvoren za korištenje. Pothodnik su otvorili vršilac dužnosti premijera Kantona Sarajevo Muhamed Kozadra, ministrica pravde Kantona Sarajevo Velida Memić i direktor Direkcije za puteve KS-a Adem Zolj. Ovoj svečanosti prisustvovao je i prvi čovjek Općine Ilidža, načelnik prof. dr. Senaid Memić. Stup je godinama predstavljao problem kako pješacima, tako i vozačima, jer su se na ovom čvorištu stvarale velike gužve, ali i dešavale česte

saobraćajne nesreće. Izgradnjom Stupske petlje smanjit će se gužve, a izgradnjom pothodnika je osigurana bezbjednost građanima prilikom prelaska ceste. Pothodnik ima dva izlaza na tramvajska stajališta i izlazišta na desnoj i lijevoj strani glavne saobraćajnice. Kozadra je izjavio da o značaju pothodnika dovoljno govori činjenica da na tom dijelu dnevno prođe oko 60.000 automobila i hiljade pješaka, što je stvaralo velike gužve na Stupskoj petlji. Pojasnio je da je petlja dio investicije finansirane kreditom Evropske razvojne banke od 37,5 miliona eura, odnosno njene prve faze vrijedne 16,5 miliona eura za 12 transverzalu i Južnu longitudinalu, a da će ostatak od 21,5 miliona eura biti iskorišten za gradnju Prve transferzale (od Željezničke stanice prema Vogošći).

## Objavljen konkurs za stipendiranje talentovanih učenika i studenata

Općina Ilidža objavila je 15. oktobra Konkurs za stipendiranje talentovanih učenika u srednjem i studenata u visokoškolskom obrazovanju u školskoj/akademskoj 2014/2015. godini. Stipendije će se dobijati za jednu nastavnu godinu i isplaćivat će se 10 mjeseci. Jedan od uslova je da su redovni učenici javnih ustanova srednjih škola Kantona Sarajevo i redovni studenti visokoškolskih ustanova( fakulteti/akademije) članica Univerziteta u Sarajevu. Visina mjesečne stipendije za učenike srednjih škola i studente prve godine fakulteta iznosit će 78 KM, dok za studente starijih godina visina stipendije ovisi o prosjeku ocjena i kreće se u rasponu od 96 do 120 KM.



### Konkurs za stipendiranje učenika i studenata slabijeg imovnog stanja

Općina Ilidža objavila je Konkurs za stipendiranje učenika i studenata slabijeg imovnog stanja u školskoj/akademskoj 2014/2015. godini. Pravo na apliciranje imaju redovni učenici javnih ustanova srednjih škola Kantona Sarajevo i redovni studenti visokoškolskih ustanova Univerziteta u Sarajevu, učenici koji su od prvog do četvrtog razreda završili sa najmanjim uspjehom vrlo dobar (4), a studenti sa prosjekom ocjena iz prethodne godine studija najmanje (7,5), kao i da nisu ostvarili pravo na stipendiju po nekom drugom osnovu od druge institucije, te da nemaju prihod po članu zajedničkog domaćinstva veći od 300,00 KM. Za srednje obrazovanje u akademskoj 2014/2015. godini stipendirati će se 40 učenika od prvog do četvrtog razreda i 50 studenata od prve do pete godine fakulteta. Visina mjesečne stipendije za učenike iznosi 75,00 KM, a za studente 100,00 KM.

## Produženo važenje certifikata standarda EN ISO 9001:2008 i Sistema okolinskog upravljanja EN ISO 14001:2004



Općina Ilidža je 22. oktobra bila predmet drugog nadzornog audita prema zahtjevima standarda EN ISO 9001:2008 i Sistema okolinskog upravljanja EN ISO 14001:2004. Nakon što je izvršen uvid u dokumentaciju, certifikacijska kuća „Tuvadria“ potvrdila je Općini Ilidža Certifikat standarda kvaliteta EN ISO 9001:2008 i Sistema okolinskog upravljanja EN ISO 14001:2004. Inače, implementacijom ovih sistema upravljanja unaprijeđuje se kvalitet pružanja usluga građanima i nastoji se utjecati na svijest građana o okolinskom upravljanju. Građani su uključeni u planiranje budžeta, kreiraju ga, u program prioriteta, rad komunalne infrastrukture, izradom značajnih strategija i sl. Općina Ilidža i dalje će biti efikasan servis u službi građana i u potpunosti će nastojati ispunjavati zahtjeve i očekivane potrebe svih njenih korisnika.



## Završeno asfaltiranje osam ulica

Na području općine Ilidža završeno je asfaltiranje osam ulica. Ulica 6. april u MZ Hrasnica I, dobila je novi asfalt u dužini od 250 i širini pet metara. Investitor je Općina Ilidža, a vrijednost radova je 65.000 KM. Izvođač radova je bila firma Sarajevoputevi d.d. Ulica Vjekoslava Klajića u MZ Otes rekonstruisana je u dužini od 80 i širini 4,5 metara. Investitor je Općina Ilidža u vrijednosti od 20.000 KM, a izvođač radova je bila firma Sarajevoputevi d.d. Završeno je asfaltiranje u ulici Tukovi MZ Osjek. Vrijednost projekta čiji je investitor Općina Ilidža je 40.000 KM, a posao je bio povjeren firmi MGBH d.o.o. Ulica je rekonstruisana

u dužini od 300 metara i širini 3,5 metara. Završeno je asfaltiranje u ulici Vreoca (MZ Vreoca) u dužini od 300 i širini četiri metra. Investitor je Općina Ilidža u vrijednosti od 40.000 KM, a izvođač radova je firma MGBH d.o.o. Rekonstrukcija ulice Osmana ef. Rastodera je okončana u MZ Osjek. Dužina ulice je 250 metara i širina 4,5 metara. Vrijednost radova je 40.000 KM, a izvođač MGBH d.o.o. U MZ Blažuj rekonstruisane su dvije ulice, Kamenolom i Plantaže. Izvođač radova bio je Mevludin Commerce d.o.o, a investitor Općina Ilidža. Ulica Kamenolom rekonstruisana je u dužini od 275 i širini četiri metra, dok je ulica

Plantaže u dužini 250 i širini četiri metra. Vrijednost ovih radova je ukupno 80.000 KM. Završeno je i asfaltiranje ulice u MZ Stup, Ismeta Alajbegovića Šerbe i u MZ Otes, ulice Ivana Brkića. Investitor ovih radova je Općina Ilidža, a izvođač Sarajevoputevi d.d. Ukupna vrijednost radova je 110.000 KM. U Mjesnoj zajednici Otes asfaltirane su pješačke staze i saobraćajnica u ulici Vjekoslava Klajića. U ovoj MZ također se vršilo asfaltiranje kraka ulice Oteška i jednog dijela ulice Ivana Brkića. Iznos ove investicije je oko 70.000 KM, a izvođač radova je firma Sarajevoputevi d.d. Općina Ilidža je finansijer ovog projekta.



### Sedmica borbe protiv tuberkuloze

Obilježavanje sedmice borbe protiv tuberkuloze je jedna od redovnih i vrlo značajnih aktivnosti u kalendaru Crvenog križa. Stoga se svake godine od 14. do 21. septembra provode različite akcije u cilju podizanja svijesti šire javnosti o ovom problemu. U sklopu obilježavanja sedmice borbe protiv tuberkuloze Crveni križ Ilidža održao je nekoliko aktivnosti gdje su registriranim osobama oboljelim od tuberkuloze uručeni paketi hrane i higijene, u Prvoj osnovnoj školi je održano predavanje na temu „Šta znam o tuberkulozi?“, organizovana je i akcija dobrovoljnog darivanja krvi u prostorijama CK Ilidža, dok je sedmica borbe protiv tuberkuloze obilježena i u Sedmoj osnovnoj školi gdje su učenici napravili plakat na ovu temu.



### Podijeljeno 200 kurbana

U povodu Kurban-bajrama Prva samostalna brigada Stup podijelila je 200 kurbana porodicama socijalno ugroženih članova brigade. "Kurbane smo dobili zahvaljujući dobroj saradnji sa načelnikom Općine Ilidža prof. dr. Senaidom Memićem, koji je sa donatorima obezbijedio kurbane, te mu se iskreno zahvaljujemo na tom gestu u ime svih ovih porodica", kazao je Samir Mehić iz Udruženja Prva samostalna brigada.

# Dan mentalnog zdravlja na Ilidži

Centar za mentalno zdravlje RJ Dom zdravlja Ilidža i Udruženje za zaštitu mentalnog zdravlja „MENSSANA“ Ilidža, a u povodu Svjetskog dana mentalnog zdravlja, 10. oktobra 2014. godine u prostorijama službe obilježen je Dan mentalnog zdravlja na Ilidži, na temu „Živjeti sa šizofrenijom“. „Statistika pokazuje da je, u periodu poslije rata u Bosni i Hercegovini, povećan broj osoba koji imaju neki od problema s mentalnim zdravljem. Namjera ove kampanje je da se doprinese podizanju svijesti javnosti o važnosti očuvanja mentalnog zdravlja i nužnosti destigmatizacije osoba koje žive s nekim od problema te vrste. Šizofrenija pogađa oko 0,3-0,7 posto ljudi tokom života i pojavljuje se 1,4 puta češće kod muškaraca u odnosu na žene“, kazala je Elvira Ališahović-Gelo, odgovorni ljekar službe. U okviru dana organizovana je izložba ručnih radova korisnika usluga centra i udruženja, koji dva puta sedmično u prostorijama ovog centra, uz stručni nadzor terapeuta imaju grupne terapije na kojima se druže, crtaju i razmjenjuju svoje ideje.



## Obilježen Dan borbe protiv trgovine ljudima

Mladi edukatori Crvenog križa Ilidža obilježili su Evropski dan borbe protiv trgovine ljudima. Predavanja iz oblasti borbe protiv trgovine ljudima su održana u Prvoj osnovnoj školi, Četvrtoj osnovnoj školi i Četvrtoj gimnaziji Ilidža. Na trgu ispred Četvrte gimnazije su bili postavljeni info pultovi gdje su se građani mogli informisati o ovoj temi i dobiti promotivni materijal.



## Policija u zajednici



Početkom školske godine, pripadnici Četvrte policijske uprave Ilidža proveli su projekat "Policija u zajednici". Učenici Prve, Šeste, Osme osnovne "Amer Čenanović" i Katoličkog školskog centra, imali su priliku da se druže sa službenicima Četvrte policijske uprave Ilidža. U okviru ovog druženja učenici prvog razreda su prisustvovali predavanjima

„Djeca u saobraćaju“ i „Policajac prijatelj“. Učenici su upoznati o aktivnostima službenika policije na stvaranju bezbjedonosnih uslova prilikom njihovog dolaska, boravka i odlaska iz škole, kao i o programu "Rad policije u zajednici", te u skopu navedenog programa održali predavanja o temi "Razvijanje discipline i samodiscipline-poštivanje pravila kretanja u saobraćaju", a učili su ih i o razvijanju svijesti o važnosti sigurnog kretanja u saobraćaju i odgovornosti u tome, navikavanju na samoodgovornost u saobraćaju, razvijanju svijesti o kulturi ponašanja u saobraćaju, prijelaz preko ceste gdje nema semafora, te o opremi koju koriste policajci u svom radu, način rada policije i slično. Policajci u zajednici će u narednom periodu ostvarivati kontakte sa direktorima i pedagozima osnovnih i srednjih škola, a sve u cilju poboljšanja stanja sigurnosti ispred i u školama. Za učenike osmih razreda Šeste osnovne škole realizovana su predavanja „Međuvršnjačko nasilje“ i „Prisutnost droge u školi“.





## Obilježena godišnjica pogibije Mehe Porobića i Ivica Stanića

Memorijalnim susretima 8. oktobra u Azićima je obilježen dan pogibije sarajevskih heroja Mehe Porobića i Ivica Stanića, dobitnika najvećeg ratnog priznanja Zlatni ljiljan. Delegacije porodica, boračkih udruženja, predvođene načelnikom Općine Ilidža prof. dr. Senaidom Memićem položile su cvijeće na spomen-ploče ovim braniteljima i odale im dužno poštovanje. Meho Porobić, pukovnik i načelnik štaba 102. motorizovane brigade, pored Zlatnog ljiljana, dobitnik je Ordena za vojne zasluge sa zlatnim mačevima, a ove nagrade su mu posthumno dodijeljene. Poginuo je sa saborcima 8. oktobra 1992. u borbama za Aziće. Na istom mjestu život je časno položio i borac, major Ivica Stanić, koji je ostao da brani svoje ognjište, iako je bio pripadnik HVO-a. „Ovo je bolan, težak, ali i ponosan i prkosan dan, na koji obilježavamo pogibiju našeg Mehe, mog supruga. Nije mi lako u ovim trenucima, jer mi se vraćaju ti teški dani. Tužna sam i ponosna,

a on nas obavezuje i svi poginuli za ovu državu, da pamtimo, sjećamo se i nikad ne zaboravimo. Drago mi je što se ipak neko sjeća da pogibija moga muža nije bila uzaludna”, rekla nam je supruga Mehe Porobića, Jasmina. Prigodan program i historijski čas za osnovce održan je i ispred prostorija MZ Stup. Načelnik Općine Ilidža prof. dr. Senaid Memić rekao je da žrtve za BiH ne smiju nikad biti zaboravljene. „Mi koji smo preživjeli moramo znati da su ove prostore branili i odbranili najbolji sinovi. Nema kriterija da izmjerimo hrabrost i žrtve ovih ljudi. Vaše obrazovanje i vaša budućnost zavisi od ljudi koji odbranili BiH. U lekcijama u školi vi ne učite šta se dešavalo i jedini način je istorija koju vam vaši roditelji moraju pričati i historijski časovi po ovakvim događajima. Kada budete predstavljali BiH uvijek pokažite ko ste i recite da živite u najboljoj državi na svijetu BiH, za koju su poginuli mnogi, koji nikad ne smiju biti zaboravljeni”, poručio je načelnik Memić.

## Obilježen dan kada su oslobođeni Hojta, Javorak, Šiljak i Kočerina

U prisustvu saboraca, članova porodica, prijatelja, te predstavnika Općine Ilidža i boračkih udruženja, a u organizaciji Udruženja „Maloljetni borci Armije RBiH“ Ilidža i Općine Ilidža, 28. oktobra 2014. godine obilježena je godišnjica bitaka za odbranu Bjelašnice i Igmana pod nazivom „Operacije oslobađanja Hojte, Javoraka, Šiljka i Kočerina“. Učenjem Fatihe i polaganjem cvijeća na spomen-obilježja na Bjelašnici kod hotela Maršal, na Bijeled vodi i Ljuljevu stijenu odata je počast svim borcima koji su u ovim bitkama dali svoje živote. Prisutni su se prisjetili tih teških, ali i herojskih ratnih dana kada su se vodile najteže i najsudbonosnije bitke za odbranu ovih strateški važnih prostora za odbranu Sarajeva, ali i cijele Bosne i Hercegovine.







# RES PUBLICA AQUARUM S...

Još u neolitskom periodu ljudi su naseljavali područje Ilidže, prvenstveno zahvaljujući plodnom tlu i obilju vode. Stari Rimljani na Ilidži počinju iskorištavati ljekovitu vodu i na ovom području grade kupališta - terme. Osmanski period je konačno dao ime ovom prostoru, s obzirom da turska riječ *iladž* znači lijek. Svih ovih ilidžanskih ljepota bivaju svjesni i Austrougari, u čije je vrijeme zasađena Velika aleja, sačinjena od 726 stabala platana i divljeg kestena, te izgrađen banjski kompleks sa hotelima. Zapadni dio Balkanskog poluotoka Rimljani pokoravaju početkom nove ere nakon dvostoljetnih ratova i posebno nakon Velikog ustanka autohtonih plemena, koji je poznat i pod nazivom Veliki ilirski ustanak. Arheološki nalazi na Ilidži daju podatke na osnovu kojih se može zaključiti da rimska naselja nisu imala niti izrazito trgovački niti izrazito proizvodni karakter, ali bogatstvo ljekovitom vodom neosporan je dokaz važnosti

ovog područja. Termalna naselja su u rimskom društvu imala značajnu ulogu u svakodnevnom životu i bila su sjecišta susreta onovremenih uglednih ličnosti. Čuveni rimski natpis koji je pronađen na kamenoj bazi u konstrukciji mosta na rijeci Željeznici 1936. godine donosi nepotpuno ime ovog naselja u formi *Aquae S...* jasno govori o autonomnom statusu naselja i njegovom značaju. Izrastavši u jasno profiliranu naseobinu u rangu kolonije naselje *Aquae S...*, postaje i središte uprave autohtone peregrinske zajednice. Arheološka istraživanja su dala podatke po kojima se može zaključiti da je naselje uz termalno vrelo bilo razvijeno već krajem 1. stoljeća, te da je značajniji razvoj doživjelo tokom 2., 3. i 4. stoljeća. Ostaci rimske arhitekture na Ilidži govore o postojanju različitih objekata karakterističnih za skoro svako rimskodobno razvijenije naselje urbanog tipa. Ostaci rimskih objekata podignutih uz sam termalni izvor na Ilidži otkriveni su na području Lužana na lijevoj obali rijeke Željeznice 1893. godine. Te godine prilikom podizanja hotela Bosna otkriveni su temelji većeg građevinskog objekta. Arheološka istraživanja su nastavljena nakon duge vremenske pauze tek 1949-1950. i 1955-1958. godine, te krajem osamdesetih godina 20. stoljeća. Nažalost, istraživanja ovog termalnog kompleksa i pripadajućeg naselja nikada nisu bila kompletirana niti su potpuno završena. Sve su ovo potencijali čime Ilidža treba da se ponosi i ono što Ilidžu može predstaviti u najboljem svjetlu.



Mozaik sa likom nimfe, 2-3. st.



Plan rimskog termalnog objekta, 3-4. st.



Mozaik sa likom Amora na morskome lavu, 3. st.





# Završena manifestacija Dan otvorenih vrata SPAJALICE

“Slobodno vrijeme sa smislom” je slogan kojim se Obrazovno-razonodni centar za mlade SPAJALICA rukovodi od svog otvaranja 2008. godine. Plemenita misija SPAJALICE jeste da u sve svoje aktivnosti uključi što više mladih i djece, koji će baš u SPAJALICI upotpuniti svoje slobodno vrijeme te se neformalno obrazovati i potaknuti želju za društveno-korisnim angažmanom. Zbog toga svake godine SPAJALICA organizira manifestaciju Dan otvorenih vrata koji je ove godine 10. oktobra. „Posjetili su nas učenici sedmih, osmih i devetih razreda iz šest osnovnih škola sa područja Ilidže. Osim što su se

djeca odlično zabavila i međusobno družila, saznali su interesantne stvari o volontiranju, i aktivnostima koje SPAJALICA svakodnevno nudi te na koji način se mogu uključiti u naše aktivnosti. Svi su uživali u ponuđenim aktivnostima, ponajviše tokom radionice grafitiranja i interaktivnoj igri uloga. Profesori, pedagozi i nastavnici koji su bili u pratnji djece nisu krili svoje oduševljenje programom te su izrazili interes za buduću suradnju. Hvala svima na posjeti i zaista sam presretna vidjeti ovoliko broj učenika na jednom mjestu u opuštenom druženju i kreativnom radu”, istakla je

voditeljica Obrazovno-razonodnog centra za mlade SPAJALICA, Vesna Filipović. Ponudu Spajalice su dodatno oplemenili volonterke i volonteri koji su imali odgovoran zadatak tokom ove manifestacije. Volonterke i volonteri te stalni radni tim Obrazovno-razonodnog centra za mlade SPAJALICA se raduju svakoj novoj prilici za druženje s mladima. SPAJALICA, čija je posjećenost sve veća, sa svojom kreativnom ponudom zasigurno je interesantna mladima, ali i onim nešto starijim korisnicima njenih usluga, kojima su vrata SPAJALICE svakoga dana širom otvorena.

## Jesenji sajam pčelarstva

Jesenji sajam pčelarstva održao se na Ilidži od 13. oktobra i trajao do 17. oktobra 2014. godine. Sajam je organizovalo Udruženje pčelara “Behar”, a svoje proizvode građanima Ilidže prezentovalo je 15 izlagača sa područja Ilidže, iz Hercegovine, Žepe i okoline Sarajeva. Na sajmu su bili izloženi pčelinji proizvodi i oprema, a kako nam je kazao Hamed Čajić iz Udruženja pčelara “Behar” u ponudi su livadski, bagremov i šumski med. “Zadovoljni smo posjetom, građani se interesuju, prilaze i pitaju za cijene meda koje se kreću od 15 do 20 KM. Želimo da se podigne svijest o potrebi većeg konzumiranja meda i pčelinjih proizvoda kao što su propolis, medne kapi i polenov prah”, rekao je Čajić. Građani osim meda i pčelinjih proizvoda mogu kupiti tahan halvu, eterična ulja, čajevе, heljdine proizvode i mnoge druge.



# Udruženje za engleski jezik i kulturu „English club“



Kontinuiranom općom globalizacijom u svim sferama ljudskih aktivnosti učenje stranih jezika jednostavno postaje obaveza i ultimativni uvjet uspješnog funkcioniranja na različitim poljima. Engleski jezik, kao najzastupljeniji u poslovnoj komunikaciji, posebno edukaciji svih nivoa i profila je neizostavan alat bez obzira na potrebe, interesovanja i dob njegovih korisnika. Osjetivši potrebu za drugačiji, kvalitetniji, konkretniji oblik učenja engleskog jezika, ali i kulture anglo-saksonskog područja, zaljubljenici u ovu oblast, odlučili su formirati Udruženje za engleski jezik i kulturu sa sjedištem na našoj općini Ilidža. „Za relativno kratak period rada, pet mjeseci, okupili smo značajan broj osoba različite životne dobi na različitim nivoima učenja stranih jezika. U našem Udruženju imamo grupe seniora, kojima je prioritet poslovna komunikacija. Imamo i omladinu osnovnoškolskog i srednjoškolskog uzrasta. Posebno smo ponosni na naše najmlađe, predškolce, koji svoja prva saznanja o stranim jezicima stižu upravo sa nama“, kazala nam je Edisa

Radončić, predsjednica ovog udruženja. Uspjeli su organizirati posjetu Udruženju prijatelja iz American corner, gdje su se njihovi najmlađi članovi odlično zabavljali. „U posjeti seniorskoj grupi je bio i uvaženi profesor sa Univerziteta u Landau in der Pfalz, iz Njemačke i prof.dr. Walter Schreiber. Posjetili su nas i pripadnici SFOR-a, smješteni u bazi Butmir, iz sastava kontingenta vojske Ujedinjenog Kraljevstva (Velike Britanije). Namjera nam je i ubuduće saradivati sa različitim institucijama i ustanovama, sve u cilju usavršavanja stečenih znanja, ali i upoznavanja kulture drugih naroda“, dodala je profesorica Radončić. Zbog pokazanog interesa njihovih članova u okviru Udruženja se realizuju i časovi učenja njemačkog jezika. Svi edukatori u Udruženju su visokoobrazovani profesori stranih jezika jednako motivirani da svoja bogata iskustva prenesu na sve polaznike-članove udruženja. Časovi se održavaju u Butmiru u Domu kulture, radnim danima od 17.30 do 20.00 sati i subotom.

## Pomoć u obanovi Gaze



Gradonačelnik Sarajeva Ivo Komšić, načelnik Općine Stari Grad Ibrahim Hadžibajrić, predsjedavajuća Općinskog vijeća Novi Grad Sarajevo Edina Gabela i pomoćnica načelnika za finansije Općine Ilidža Azra Stambolić, 31. oktobra 2014. godine su zajedno sa Mohammadom Hamadom, predsjednikom Udruženja palestinske dijasporu u BiH, u prostorijama Gradske uprave potpisali Protokol o saradnji na zajedničkoj realizaciji projekta pomoći u obnovi Gaze. Ovim projektom predviđena je pomoć stanovnicima Gaze u opremanju rasvjetom kuća siromašnih porodica (400 domaćinstava). Projekat je ukupne vrijednosti od 25.000 američkih dolara što iznosi 38.250 KM. Za realizaciju ovoga projekta, Općina Novi Grad je izdvojila 15.000 KM, općine Stari Grad i Ilidža po 10.000 KM, a Grad Sarajevo 7.000 KM. U ime naroda Gaze i Palestine, predsjednik Udruženja palestinske dijasporu u BiH, Mohammad Hamad se zahvalio na ovoj zajedničkoj akciji Grada Sarajeva i gradskih općina, naglasivši da je narod Bosne i Hercegovine do sada na humanitarni broj Humanitarne organizacije Human-Appeal-Palastine sa sjedištem u Palestini uplatio 40.000 KM, koji će biti utrošen za potrebe palestinskih školaraca.



## Prvi memorijalni turnir u stonom tenisu „Aida Lušničkić“

U organizaciji Udruženja stonoteniski klub „Ilidža“ u prostorijama Doma kulture Stupsko brdo 1. oktobra 2014. godine održan je Prvi memorijalni turnir u stonom tenisu „Aida Lušničkić“, a u znak sjećanja na rano preminulu pomoćnicu načelnika za obrazovanje, kulturu, sport i informisanje u Općini Ilidža, rahmetli Aidu Lušničkić. Turniru su pored članova porodice prisustvovali i Aidini brojni prijatelji, sportisti i radne kolege iz Općine Ilidža. U svom obraćanju učesnicima turnira i gostima predsjednik skupštine stonoteniskog kluba Džemal Habibija je istakao da je Aida dala veliki doprinos u razvoju sporta i stvaranju uslova za masovno bavljenje sportom i da se nada da će turnir postati tradicionalan. Turnir su simbolično otvorili

Aidin sin Irfan Lušničkić i Velida Memić ministrica pravde i uprave u Kantonu Sarajevo koja je sa rahmetli Aidom radila i saradivala. „Bila mi je radna kolegica u Općini Ilidža sa kojom je bilo zadovoljstvo i lakoća saradivati, a pored toga bila mi je prijateljica. Prije svega Aida je bila uzorna supruga i brižna majka koja je odgojila dvoje krasne djece, sina Irfana i kćerku Selmu“, kazala ministrica Memić. Na turniru je učestvovalo 30 stonotenisera koji su se takmičili u kategoriji pionira i seniora. Prvo mjesto u kategoriji pionira osvojio je Ervin Vladić, drugo Abdulah Puškar i treće Engin Nesimi. Od seniora prvi je bio Kerim Mulaomerović, drugi Admir Musić i treći Haris Seferović. Pobjednicima u obje kategorije su uručeni pehari.



## Odbojkašice Igmana pobjednice turnira

U organizaciji ŽOK Igman i pod pokroviteljstvom Općine Ilidža i Ministarstva kulture i sporta Federacije BiH, a u povodu obilježavanja 35 godina postojanja Ženskog odbojkaškog kluba Igman Ilidža, 11. oktobra 2014. godine u KSC Ilidža odigran je tradicionalni turnir ženskih ekipa u odbojci „Ilidža volleyball cup 2014“. Na turniru su, pored domaćina ŽOK Igman učestvovala i ekipe OK Vitez, ŽOK SA Volley i OK Victory iz Novog Travnika. Prvo mjesto na turniru osvojila je ekipa Igmana koja je u finalu savladala ekipu Viteza sa 3:0

kojoj je pripalo drugo mjesto. U utakmici za treće mjesto odbojkašice ŽOK SA Volley-a bile su bolje od odbojkašica OK Victory. Za najbolju igračicu turnira proglašena je Naida Abdulahović (ŽOK Igmana), najbolji bloker Merima Hadžić (ŽOK Igman), najbolji smečar je Iman Isanović (ŽOK Volley), najbolji tehničar je Minela Sačić (OK Vitez) i najbolji libero Edvina Imamović (ŽOK Igman). Za osvojeno prvo, drugo i treće mjesto na turniru ekipama, a i najboljim igračicama su dodijeljeni pehari.



## Predstavljamo: Lovačko društvo „Igman“ Ilidža

Realizujući jednu od značajnijih višegodišnjih i trajnih aktivnosti, kojoj Lovačko društvo „Igman“ Ilidža poklanja veliku pažnju, a koja je i zacrtana Godišnjim planovima gospodarenja lovištem, jeste edukacija članova pripravnika i članova sa statusom „podmladak“. Pioniri, budući lovci, su izvedeni u dio lovišta na Igmanu, da bi kroz svoj rad i obuku stekli opća poznavanja iz lovstva, lovišta i prirode. Malu, ali vrijednu ekipu su činili: Alisa Sjenar, Baris Bunar, Irnis Jahić, Emir Šubo, Faris Bilalović, Ammar Kahvić i Faris Alap. Glavni lovovođa i sekretar Društva su ih proveli rejonom obišavši dijelove lovišta gdje se nalaze lovni objekti, a objašnjeno im je kako se koji lovni objekat zove i čemu služi, pokazani su im tragovi raznih vrsta divljači i raznih vrsta drveća i biljaka koji se nalaze u prirodi i kojima se divljač najčešće hrani. Svojim dječjim rukama su dopunili nekoliko solila, hranilišta i pojilišta za divljač, te su provedeni lovačkim stazama i terenima sa interesantnim mjestima, uz objašnjenje orijentacije u prirodi.

Obuka je nastavljena podučavanjem o rukovanju oružjem i gađanjem mete iz vazdušnog oružja, što je ostavilo poseban dojam kod „podmlatka“, a završena je roštiljadom koju su im pripremili stariji lovci. Vrijedno je i pomena da ove aktivnosti njihov član Halil Čulov, dedo pionira Mirze, svake godine pomogne i novčanom donacijom. I dok su se pioniri podučavali, redovni članovi su iskoristili priliku i izvršili svoje zadatke u lovištu raskresujući lovačke staze, raznoseći so i hranu za divljač, koseći travu i sakupljajući sijeno za ishranu divljači u predstojećem zimskom periodu, a sve u prisustvu pionira i sa objašnjenjima o tome koja je svrha ovih radova. Svoj trud ovoj priči su uložili Ruzmir Bašalić, Seid Bilalović, Sulejman Čatović, Abid Mehmedika, Selmir Zilkić, Fadil Sarajkić, Akif Kahvić, Senad, Enes i Izet, te Bajro Ploskić i Elvedin Ploskić, koji je ponudio doniranje salonit-tabli za izgradnju nadstrešnice koja bi se koristila za naše potrebe u ovom dijelu lovišta.

## Eso Sabrihafizović ispraćen u penziju

Uposlenici Službe za koordinaciju rada MZ upriličili su u zgradi Općine, svečani ispraćaj kolege Esada Sabrihafizovića u penziju. Šef Službe Enes Čorbo izrazio je zahvalnost penzionisanom uposleniku naglasivši da je svojim dugogodišnjim iskustvom i idejama dao veliki doprinos razvoju lokalne zajednice. Ispraćaju je prisustvovao i Općinski načelnik prof. dr. Senaid Memić, koji u svojoj radnoj praksi prisustvuje ispraćaju uposlenika u penziju, zahvalivši Esadu na korektnom i profesionalnom odnosu prema poslu i zaželio mu mnogo sreće i zdravlja u penzionerskim danima. "Hvala kolegama na ovom ispraćaju i načelniku koji je odvojio vrijeme da prisustvuje ovom događaju", rekao je Esad Sabrihafizović. Kolege su mu uručile prigodan poklon.





## Projekat „Edukacija o ovisnostima“

„Edukacija o ovisnostima“ naziv je projekta koji je održan 07. oktobra 2014. godine u Osmoj osnovnoj školi „Amer Čenanović“, u organizaciji Kulturnog društva „Stup“. U ovom projektu učestvovalo je po devet učenika iz deset osnovnih škola sa područja Ilidže, sedmih, osmih i devetih razreda. Psiholog Remzija Šetić je održao predavanje o temi dječijih prava, sprečavanja nasilja nad djecom i ovisnosti

o drogama. Ovaj projekat je podržalo Ministarstvo za rad, socijalnu politiku izbjegla i raseljena lica Kantona Sarajevo, a učesnicima je podijeljen promotivni materijal, majice i hrana. „Očekujemo da naši osnovci dobiju korisne informacije koje će biti pozitivne u njihovim percepcijama kada je riječ o ovisnostima. Posebno je naglašeno u ovim predavanjima da je potrebno čuvati vrijednosti našeg društva, jer vrijednosti čuvaju nas. Naše vrijednosti na koje trebamo biti ponosni su porodica, sloboda, demokratija, tolerancija i obrazovanje... Iskreno se nadam da će se projekat nastaviti i postati tradicija“, rekao nam je Elvir Kazazović iz KD „Stup“.



## Novi autobusi za potrebe javnog prijevoza na području općine Ilidža

Javnom komunalnom kantonalnom preduzeću GRAS uručena je donacija od 15 autobusa, koji su poklon grada Istanbula Kantonu Sarajevo. Radi se o drugom kontigentu iz donacije od 30 autobusa koje je Istanbul namijenio građanima Kantona Sarajevo. Nekoliko autobusa i to za naselja Otes, Sokolović Koloniju, Osijek i Rakovicu, će biti namjenjeno potrebama javnog prijevoza na području općine Ilidža kako bi se riješili problemi prijevoza i olakšao život građana Ilidže.



## KK “Impuls” osvojio prvo mjesto u A1 ligi

Seniorska ženska ekipa KK “Impuls” osvojila je prvo mjesto u A1 ligi Federacije Bosne i Hercegovine bez jednog poraza i time se plasirali u najveći rang ovog takmičenja, Premijer ligu Bosne i Hercegovine. “KK „ Impuls” je nakon deset godina od kako postoji i od kada se takmiči ostvario najveći uspjeh. Rezultat je ostvaren kroz kontinuiran rad u mlađim kategorijama i u ženskoj kao i u muškoj selekciji. U klubu trenutno imamo pored ženske seniorske ekipe i žensku pionirsku ekipu jer su kadetkinje i juniorke uključene u seniorsku selekciju. Imamo i dvije muške selekcije, mlade kadete i predpionire. Klub ima šest punktova škole košarke i u njima osam grupa, od kojih šest muških i dvije grupe djevojčica” kazao nam je Enis Muhović, predsjednik kluba i trener.